



**SIARAN MEDIA**  
**JABATAN PERANCANGAN EKONOMI DAN STATISTIK**  
**KEMENTERIAN KEWANGAN DAN EKONOMI**

**Daerah Temburong menjadi tumpuan pemeriksaan bersepadu JPES dan Unit SDT dalam memastikan kepatuhan terhadap Akta Kawalan Harga dan Akta Sukatan dan Timbangan**

---

Tarikh: 25hb Februari 2023

1. Jabatan Perancangan Ekonomi dan Statistik (JPES) melalui Jabatan Hal Ehwal Pengguna bersama Unit Sukatan dan Timbangan (SDT), Bahagian Industri dan Ekosistem Perniagaan (IBE) di bawah Kementerian Kewangan dan Ekonomi telah menjalankan pemeriksaan bersepadu bulanan bagi bulan Februari 2023 di premis-premis perniagaan dan tamu di Pekan Bangar, Kampong Rataie dan Kampong Puni, Daerah Temburong pada hari Sabtu, 25hb Februari 2023.
2. Pemeriksaan bersepadu bulanan ini merupakan kerjasama penguatkuasaan yang dilaksanakan secara berterusan di antara JPES dan Unit SDT dalam usaha untuk memupuk kepatuhan terhadap undang-undang di bawah kawalseliaan JPES dan SDT iaitu Akta Kawalan Harga, Penggal 142 dan Akta Sukatan dan Timbangan 1983 Penggal 151.
3. Hasil pemeriksaan bersepadu tersebut, pihak JPES telah mendapati premis-premis perniagaan mematuhi Akta Kawalan Harga, Penggal 142. Pada masa yang sama, para peniaga juga disarankan untuk sentiasa menyemak dan mengemaskini harga khususnya bagi barang yang dikawal harga. Disamping itu, para peniaga yang menjalankan perniagaan di tamu juga telah diberikan untuk sentiasa mempamerkan tanda harga ke atas barang yang dijual.

4. Manakala, Unit SDT turut mendapati dua (2) unit daripada lapan (8) unit alat sukat dan timbang yang digunakan bagi tujuan perniagaan, gagal mematuhi Akta Sukatan dan Timbangan 1983 Penggal 151 iaitu menggunakan alat sukat dan timbang yang telah tamat tempoh penggunaan. Dua (2) Notis Penyitaan telah dikeluarkan ke atas Syarikat IBA dan Syarikat Kainat Group of Company. Pemilik syarikat dikehendaki hadir ke pejabat Unit SDT dalam tempoh tujuh (7) hari waktu bekerja dari tarikh Notis dikeluarkan untuk memperbetulkan isu tersebut. Alat sukat dan timbang milik syarikat yang telah dikeluarkan Notis Penyitaan turut disita. Selain itu, Unit SDT juga mendapati tiga (3) buah syarikat perniagaan gagal mempamerkan tanda berat bersih ke atas produk-produk berbungkus.
5. Adalah menjadi tanggungjawab para peniaga untuk sentiasa peka dan patuh terhadap undang-undang yang sedia ada termasuk Akta Kawalan Harga, Penggal 142 dan Akta Sukatan dan Timbangan 1983 Penggal 151 seperti antaralainnya memastikan barang yang dikawal harga tidak dijual melebihi harga maksimum yang ditetapkan di bawah Akta Kawalan Harga, dan memastikan semua alat sukat dan timbang yang digunakan untuk tujuan perniagaan adalah berdaftar selaras dengan Akta Sukatan dan Timbangan. Kepatuhan para peniaga terhadap undang-undang berkenaan boleh membantu Negara dalam membangunkan persekitaran perniagaan yang beretika.
6. Orang ramai adalah disarankan untuk menggunakan saluran-saluran rasmi bagi sebarang aduan dan pertanyaan lanjut seperti berikut:
  - a) **Akta Kawalan Harga, Penggal 142** – Jabatan Hal Ehwal Pengguna di JPES melalui Talian Darussalam 123 (TD123) dan aplikasi mudah alih PenggunaBijak;
  - b) **Akta Sukatan dan Timbangan 1983 Penggal 151** – Unit SDT, Bahagian Industri dan Ekosistem Perniagaan melalui e-mel: sdt@mofe.gov.bn atau melalui talian: 233 4092

\*\*\*\*\*